



LUHLELO LWEKUBHALISA NGE-ELEKTHONIKI IMINININGWANE YEKUGOMA (i-EVDS) IMIBUTO NETIMPHENDVULO

- 1. Yini lekufunale kutsi ngikwente nangabe ngibhalisile ku-EVDS esikhatsini lesengcile kodvwa solo angikasitfoli satiso sesikhatsi nendzawo lapho ngitawugonywa khona?**

Nangabe ubhalisile, nakanjani litfuba lakho lekugoma litawufika. Ukhona kumarekhodi etfu kantsi ngekushesha-nje nakuvuleka sikhala endzaweni lapho utawugonywa khona utawutfoli i-SMS. Ucelwa kutsi ubeketele; angeke sishiye ngisho namunye emkhankhasweni wetfu wavelonkhe wekugoma.

- 2. Kufanele kutsi ngilindze sikhatsi lesingakanani kute ngitfole satiso sesikhatsi nendzawo lapho ngitawugonyelwa khona?**

Kutsi utayitfoli ngekushesha kangakanani i-SMS lekwatisa ngesikhatsi nangendzawo lensha lapho utawugonywa khona kuya ngekutsi tingaki tikhungo tekugoma letikhona endzaweni yakini. Njengaloku tindzawo letinengi tekugoma tivulwa maviki onkhe, tikhala letinengi titawuvuleka endzaweni lapho utawugonyelwa khona kantsi kulapho utawukwatiswa ngesikhatsi nangendzawo yekugoma.

- 3. Ngibhalisile ku-EVDS kodvwa angikasitfoli satiso?**

Ngemuva kwekubhalisa eluhlelweni lwe-EVDS, kufanele kutsi utfole i-SMS lecinisekisa kutsi ubhalisile futsi useluhlwini lwalabo labamiselwe kutsi bagonywe. Nangabe awukayitfoli i-SMS lenjalo, ucelwa kutsi ubuyele emuva ku: vaccine.enrol.health.gov.za kute uyocinisekisa kutsi ngabe ngempela imininingwane yakho ingenile yini ngekutsi ufake inombolo yakho yamatasi.

- 4. Ngibhalise ngembili kwalabanye kodvwa angikasitfoli sikhatsi nendzawo lapho ngitawugonywa khona.**

Luhlelo lwe-EVDS lusebentisa imitsetfo lefananako kuwo wonkhe umuntfu kuyo yomibili imikhakha wahulumende nalotimele. Kunikwa sikhatsi netindzawo yekugoma kuya ngelinani letindzawo tekugoma endzaweni yakho. Kuphindze futsi kuye ngesikhatsi losikhetsile njengekutsi sisekuseni nome ntsambama ngemalanga lasemkhatsini weliviki nome ngetimphelasontfo. Basebenti betfu Labanakekela Ngetemphilo bayachubeka nekugonywa futsi babekwe embili kutsi kucalwe ngabo kucinisekisa kutsi baphephile kutsi bangasekela kulwa kwetfu nale-COVID-19.

Sibonelo, nangabe uhlala endzaweni lapho kunetindzawo tekugoma letinengi, utawutfo i-SMS ngekushesha kakhulu kunemuntfu lohlala endzaweni lapho kwanyalo kusanetindzawo letimbalwa.

5. Ngibhalisile kutelusito lwami lwetekwelashwa; ngabe kusadzingekile kutsi ngiphindze ngibhalise naseluhlelweni lwe-EVDS?

Letinye tikimu tetekwelashwa tingaphindza futsi tikucele kutsi ubhalise eluhlelweni lwato kute kutsi tikutfumelele lwatiso mayelana nekugonywa. Nanome kunjalo, kutawudzingeka kutsi ubhalise naseluhlelweni lwe-EVD. Ngiyo kuphela indlela yekunikwa sikhatsi nendzawo yekugoma, akukhatsaleki kutsi ugonywa endzaweni letimele noma yahulumende, nome unemshwalensi wetekwelashwa.

6. Nginesikimu selusito lwetekwelashwa; kufanele yini kutsi ngilandzele lenchubo lefananako njengeyemkhakha wahulumende?

Telusito lwakho lwetekwelashwa kufanele kutsi tilandzele imitsetfo yavelonkhe yekukhishwa kwemijovo yekugoma njengaloku ishaywe Litiko Letemphilo. Betelusito lwetekwelashwa bavunyelwe kuphela kutsi bagome bantfu labaneminyaka yebudzala letsite njengaloku kumemetele Litiko Letemphilo. I-EVDS itakubuta kutsi unalo yini lusito lwetekwelashwa. Nangabe unalo, kutawudzingeka kutsi ufake ligama laleso sikimu nenombolo yakho yetelusito lwetekwelashwa. Loluhlelo lutawuzama kutfumela lawo malunga elusito lwetekwelashwa etindzaweni letitimele (nangabe ikhona endzaweni yawo) kodvwa kungenteka acelwe kutsi aye endzaweni yahulumende.

7. Sengintjintje indzawo yami lapho bengihlala khona, kutawuguculwa njani loko eluhlelweni lwe-EVDS?

Buyela emuva eluhlelweni lwe-EVDS uyowufaka lwatiso lwakho lolusha. NGEKE kube nekuphindzeka kwemarekhodi kuphela-nje nangabe usebentise inombolo yamatishi lefananako, lowayisebentisa ekucaleni. Loluhlelo lutawusebentisa inombolo yakho yamatishi kufaka nome ngabe ngukuphi lokusha kulwatiso lwakho lwebunguwe. Loluhlelo lwe-EVDS lwakhiwe ngendlela yekutsi lukhona kulungisa tingucuko nekufaka lokusha kulwatiso lwakho lwebunguwe.

8. Ngingaya yini kulenye indzawo yekugoma ngaphandle kwaleyo lengikhonjwe kutsi ngitawuya kuyo?

Sigcugcutela bonkhe labo labatfole satiso sesikhatsi nendzawo lapho batawugonywa khona kutsi baye etindzaweni tabo tekugoma labanikwe tona. Loko kucinisekisa kutsi utawugonywa kuleyo ndzawo nangesikhatsi lonikwe sona ngobe umjovo wakho wekugoma sewuvele ubekelwe wena lapho.

Nanome-nje sibe netinsayeya mayelana nebantfu labavele-nje batsелеке endzaweni yekugoma ngaphandle kwekubitwa ngeliviki lekucala leluhlelo lwekugoma, ematiko ayacelwa kutsi ASIVIMBE lesento. Kusatjalaliswa kwemijovo yetfu yekugoma kuhleleke ngekucophelela. Sicondzanisa kufuneka kwemijovo yekugoma

nekuphakelwa kwayo kucinisekisa kutsi kunemijovo yekugoma leyanele ngalelo langa.

Kuvakashela endzaweni leniketiwe kuphindze futsi kuisite kutsi sichube umkhankhaso wetfu wekugoma ngendlela lehlelekile. Loku kuvimba kutsi bantfu bangafiki babe sicu bese kudaleka “tenteko letisinyokotfo” endzaweni yinye, bese loko sekubanga bungoti bekutsi kube tehlakalo lesetibhebhethsekisa leligciwane kakhulu.

9. Ngabe loluhlelo lwe-EVDS luncuma njani kutsi nguyiphi indzawo yekugoma lotawutfunyelwa kuyo?

Loluhlelo lutawutentela lona lukunike indzawo lesedvute nelikheli lasekhaya nome lasemsebentini lolibhalisile. Etindzaweni tasemadolobheni, lutakunika indzawo lesondzele nge-10km kulelo likheli kantsi etindzaweni tasemaphandleni kutawuba sikhungo lesisondzelenene nge-30km nendzawo lohlala kuyo nome losebenta kuyo. Sikhatsi losikhetsako sekugonywa ngesikhatsi ubhalisa njengekutsi ekuseni nome ntsambama emkhatsini weliviki nome ntsamba ngetimphelasontfo sinemtselela ekutfolakaleni kwesikhatsi nendzawo yakho yekugonywa.

10. Kwentekani nangabe ngincume kutsi ngivele-nje ngiye nome ngabe ngukuyiphi indzawo yekugoma?

Sicela bantfu kutsi BANGAMANE baye etindzaweni tekugoma bangakabitwa. Kuvele-nje uye endzaweni yekugoma akusho kutsi utawugonywa masinyane. Tindzawo tekugoma tingabasita bantfu labaneminyaka lenge-60 nalabangetulu mayelana neLuhlelo Lwekubhalisa Nge-elekthroniki Imininingwane Yekugoma (i-EVDS). Kubhalisa nge-inthanethi kusesenesikhatsi kanye nekunikwa sikhatsi nendzawo yekugoma kuyindlela lencono kakhulu yekucinisekisa kutsi utfola umjovo wakho wekugoma.

11. Kwentekani nangabe awukaphumeleli kuya endzaweni yakho yekugoma lonikwe yona?

Luhlelo lwe-EVDS lutawutentela ngekwalo lukunike lesinye futsi sikhatsi nendzawo bese lukutfumelela i-SMS nelusuku. Utawunikwa ematfuba lamatsatfu – litfuba lekucala lebewunikwe lona kanye NALAMABILI ngetulu. Nangabe awukakhoni kuya ngalamatfuba lonikwe wona, kutawufuneka kutsi ushaye le lusingo lwekusita lwe-COVID ku: 0800 029 999 ubacele kutsi bakubhalise futsi. Lirekhodi lakho lekubhalisa lihlala liseluhlelweni kodvwa angeke lwati loluhlelo kutsi uselivini, awukho, uyagula nome awusekho emhlabeni, ngako-ke lulindzele wena kutsi ubatsintse.

12. Kufanele kutsi ngente njani nangabe ngite incwajana lesemsetfweni leyatisa kutsi ngingubani?

Litiko Letemphilo lisasebenta indlela letawuvumela bantfu labete tincwajana letisemtsetfweni letatisa kutsi babonani kutsi nabo bagonywe. Imininingwane yaloluhlelo itawumenyetelwa ngesikhatsi lesifanele. Lelisu lihlose kunakekela bonkhe bekuchamuka labete timphepha kanye nebantfu labete tincwajana letisemtsetfweni

tekubatisa.

13. Ngibhalisa njani nangabe angikhoni kufinyelela ku-inthanethi?

Labo labangakhoni kufinyelela ku-inthanethi nome bete bomakhalekhikhini labahlakaniphile (besimanje) bangabhalisa nge-SMS ngekutsi bashaye *134*832* inombolo yamatisi#, kantsi nangabe ute inombolo yamatisi, shaya *134*832#. Kubhalisa kungentiwa futsi ngekusebentisa inombolo yeWatsaphu ye-COVID ngekutfumela "BHALISA [REGISTER]" ku: 0600123456. Kubhalisa nge-SMS nange-Watsaphu akubiti mali, kute sidzingo sekutsi ube nemadatha nome i-artime kute ukhone kusitwa.

Nangabe awukhoni kusebentisa nome ngabe nguyiphi yaletindlela lesetibalwe ngenhla, ungaya endzaweni lenakekela ngetemphilo letisisekelo ucele sisebenti salapho kutsi sikusite. Baholi bemimango labanengi (betenkhola, betepolitiki, betendzabuko nebemabhzinisi) batinikele kutsi basite bantfu kutsi babhalise nge-inthanethi. Cela makhelwane nome umuntfu lomusha lonelikhono kanye nemathulusi kutsi akusite.

14. Bantfu labaneminyaka lengaphasi kwalenge-60 budzala bangakhona yini kubhalisa eluhlelweni lwe-EVDS?

Luhlelo lwe-EVDS lutatibalela ngekwalo iminyaka yakho lutsatsele enombolweni yakho yamatisi bese luyakutjela kutsi usasemncane kutsi ungagonywa nyalo. Kukhishwa kwemjovo kusebentisa budzala, hhayi timo tekugula kuncuma kutsi utawugonywa nini. Indvuna Yetemphilo itawumemetela kutsi lelinye licembu lemnyaka yebudzala litawucala nini kubhalisela kugonywa.

Lucwaningo luvete kutsi budzala bungumcageli lonemandla kwengca timo tekugula letibomahlalakhona kutsi ngabe utawugcina usesibhedlela nome utawushona ngenca ye-COVID-19. Timo tekugula lokubomahlalakhona letinyenti tivamisile kubantfu lasebakhulile.

15. Kudzingeka kutsi ngenteni kute ngibhalise eluhlelweni lwe-EVDS?

Kute ubhalise eluhlelweni lwe-EVDS kufanele kutsi ube nenombolo yamatisi wakho nome yepasipoti kanye nelikhadi lakho letelusito lwetekwelashwa (nangabe unalo) kuhlale kulungile. Sinyatselo sekucala kutsi ugcwalise lifomu ledigijithali ngekusebentisa lemininingwane yakho lelandzelako: Ligama nesibongo, Lusuku lwekutsalwa, Bulili, Likheli le-imeyili, inombolo yamakhalekhikhini kanye nendzawo lapho usebenta khona nome lapho uhlala khona.

Utawutfola i-SMS lecinisekisa kutsi sewubhalisile futsi sewuseludwendvweni wekutsi utfole umjovo wakho wekugoma. Nasekusikhatsi sakho sekutsi uyowujova, loluhlelo lutakutfumelela i-SMS nelusuku kanye nendzawo lapho utawugonyelwa khona. Nangabe ute makhalekhikhini nome likheli le-imeyili, ungaya endzaweni lenakekela ngetemphilo letisisekelo ucele sisebenti lapho kutsi sikusite.

16. Kwentekani ngelwatiso lwami lengilutfumele eluhlelweni lwe-EVDS?

Lolwatiso loluniketile nawubhalisa lutawusita ekuhleleni, njengaloku lemininingwane lelapha kuloluhlelo isita hulumende kutsi akhone kuphakela imijovo yekugoma

etindzaweni tekugoma. Ngekusebentisa loluhlelo, hulumende angacinisekisa kutsi imijovo yekugoma leyanele ikhona ngelilanga letsite lekugoma. Lolwatiso lutawusetjentiswa futsi kuchumana nawe mayelana neluhlelo lwekugoma nangabe kudzingeka. Yonkhe imininingwane leseluhlelweni lwe-EVDS igcinwe ngalokuvikelekile kantsi futsi loluhlelo luhambisana nayo yonkhe imitsetfo lesebentako.